

頤
道
堂
詩
選

頤道堂詩選卷二十二

錢塘 陳文述 退菴

美人湖歌

姬人管湘玉西湖詩云澹粧濃抹問何如周昉丹
青好畫圖環翠春山凝淺黛橫波秋水湛清蘆
蘿原是傾城艷花柳都疑絕世姝若把西湖比西
子西湖應是美人湖辛瑟嬋曰昔太白山人援李
供奉郎官湖之例名西湖爲高士湖今得此詩當
改名美人湖矣作美人湖歌

君不見西湖前代稱高士太初高致偶然耳挂瓢堂圯鶴
田荒碧浪歸雲渺煙渌君不見西湖今日稱美人鷗波前

世證蘭因別爲明波作佳謚澹粧濃抹宜芳春曉烟暝翠
湖之山畫屏六曲開烟鬟仙之人兮玉鍊顏天女無數來
華鬢微波皺縠湖之水奩影一泓收不起畫裙六幅嬌羅
綺人在曉粧明鏡裏外湖美人之畫堂樓臺縹緲橫中央
裏湖美人之洞房簾櫳掩映迴東廂秋是美人之瘦影春
是美人之華粧雪是美人之艷魄月是美人之流光雨是
美人之環佩雲是美人之衣裳花是美人之小影草是美
人之斷腸遠翠修蛾美人黛橫波曼睩美人睩澹雲微雨
美人情暮靄朝暉美人態兩峯樹樹美人簪雙澗羅羅美
人帶珊珊如見美人來處處都疑美人在碧樹紅闌湖上
樓美人春困被清愁畫槩蘭橈湖上舟美人宴坐翫清流

烟雲湖上開華屋美人如膏復如沐園林湖上營金谷美人如花復如玉美人兮美人是爲月姊爲花神湘宮之人雲中君凌波羅襪無纖塵美人之遊自卿止美人之名自卿始彼美人兮我所思若把西湖比西子

得隙地於寶雲山麓面臨後湖小輞川故址也思營湖館居之書寄家人

屋裏青山屋外花水邊鷗鷺樹邊鴉地鄰句漏仙人宅

近葛嶺

門對咸平處士家

與孤山相對

簾捲春陰交翠雨鏡澄秋影

浸明霞斷橋認取湖西路草綠裙腰一道斜

舊跡曾題小輞川門前輞水漲淪漣遠移奇石環書閣添種垂陽繫畫船疎影梅花禪榻外艷歌桃葉酒尊前隱居

便是王摩詰倚杖柴門聽暮蟬

椎髻提甌仗少君山厨烟靄舊羅裙新泥曉刷黃山笱晚飯香烹碧澗芹童子玉鱸三澗雪仙人丹竈兩峯雲月華在水魚燈散閒與鄰翁話夜分

遂初賦罷賦山居何幸全家入畫圖鸛渚別營高士鷗鷗波新署美人湖偶攜筵婢尋香塚相約琴僧過酒罇更喜鉤車閒問字絳紗弟子有名姝

後湖放生詩

西湖爲放生池天禧四年因王欽若請也紹興中林父乞仍其舊慶元中建枕山泳飛二亭於石函王隨碑今在錢塘門外德生堂故址也今則漁戶

數十家納漁稅答省網罟晝夜不絕後湖草深魚聚漁人於深夜船頭篝燈取之至曉始散蓋潛鱗無噍類矣嘗詢之漁家漁稅每年止百餘金關於國用者甚細擬請於大府免漁戶所納在官籌款以補之畱裏外湖以給漁戶以後湖一角仍放生池之舊於斷橋西冷錦帶三橋置水柵焉亦仁政之一端也先之以詩

西湖烟水窟煦沫之所天請作放生池肇自天禧年石函作二亭南宋猶相沿至今王隨碑兀立青山前何年此禁開網罟窮漁畋後湖葑草茂潛鱗棲深淵天陰月黑夜打槳爭叩舷瓦燈光入水照比然犀然纖鱗無遁形涸轍嗟

可憐漁租歲幾何催科驚醉眠一切蠲棄之不賦司農錢
數畧入沔池王禁之所先放生佛氏戒其道通聖賢後湖
設絲蕪水柵三橋聯亦如湖中湖風定澄潭圓我居葛鵲
麓湖翠漾輞川對面巢居閣梅鶴招嬋娟共此一湖水不
釣槎頭鰣碧響蓮葉雨紅濕桃花烟題作魚樂國伴我書
畫船

湖上畫橋名跡甚多與仲雅琴鴈諸君評定二十四
橋以配揚州明月玉簫之跡各系以詩

映波橋

蘇隄第一橋曰映波徐集孫湖
西納涼詩小艇撐過第一橋

水閣臨流柳帶飄美人涼夜解吹簫納涼小艇穿花過指

點蘇隄第一橋

鎖瀾橋

第二橋曰鎖瀾錢宰看梅圖詩花落西泠第二橋

疎影橫斜倚畫橈紛紛香雪未全消
花開花落春山路回首西泠第二橋

望山橋

第三橋曰望山蔡襄西湖晚歸詩酒到三橋月滿身

斜通花港路迢迢載酒人來夜寂寥
記取君謨晚歸路滿身明月第三橋

壓波橋

第四橋曰壓波劉渙憶舊詩重到桃花第四橋

畫檻迴闌水暈搖夕陽倒影漾春潮
劉郎重到桃花畔認取西湖第四橋

東浦橋

第五橋曰東浦周紫芝韓園讌集詩遙知第五橋邊路桐葉題詩人未歸

可有雲鬟紫綃晉卿雅集定風標
憑誰記取韓園讌桐

葉題詩第五橋

跨虹橋

第六橋曰跨虹袁宏道踏屢曲濃綠疎黃總占新六橋風日更精神

鶯語笙簧柳顰腰百花生日是花朝踏隄誰唱袁郎曲濃

綠疎黃第六橋

環碧橋

襄湖第一橋曰環碧玉泉之水出焉西通耿家步

方流漾縠晚波閒雁齒低橫碧影環真箇玉泉泉是玉長

畱清味在人間

流金橋

第二橋曰流金金沙港之水出焉西通麴院路

金沙港是古金溪一水彎環麴院西何處草堂虞學士杳

花春雨鷓鴣啼

元虞集金溪草堂在金沙港

臥龍橋

第三橋曰臥龍地近龍潭神物之所窟宅也西通茅家步

林外春山翠幾重空潭雲氣濕芙蓉隆中自有閒風月不
羨風雷起臥龍

隱秀橋

第四橋曰隱秀繞丁家山而東沿
隄屈曲蒼翠掩映西通花家山

翠黛明波掩落霞花家山色接丁家聽鶯盤馬春隄好添
種橋西一路花

景行橋

第五橋曰景行舊有三
賢祠在焉西通麥嶺路

從來隱逸卽神仙已配三賢作四賢誰向湖山分片席我
來更與薦寒泉

濬源橋

第六橋曰濬源從定香橋入
虎跑珍珠二泉之水出焉

二泉東下水潨洄寒瀑聲停翠嶂開記取楊公舊題字祇
今猶賸濬源來

七修類稿載楊公嘗自言云南畔三橋乃
吾新開之地可名濬復濬源濬治北畔三

橋舊有水口吾爲築橋
可名二龍流金涵玉也

清繞橋

在飛來峯下一名龍跡
又名龍脊今名迴龍橋

何年龍跡說迴龍清繞分明繞一峯閒與山僧坐靈鷲靜
聽兩澗響春淙

合澗橋

在飛來峯南北
二澗合流於此

避人野鳥踏空烟古木陰陰響杜鵑北澗水連南澗水可
憐都是山泉

白樂橋

在集慶寺前靈隱志合澗橋會南北二澗
西流過白樂橋謂此相傳白樂天建其水

一名後礮一名碧溪
東南越行春橋入湖

雙流何處響潺潺野逕無人浴鳥閒後礮泉聲碧溪雨祇
今人憶白香山

行春橋

行春橋小行春橋均在九里松小行春橋亦名西行春橋亦名唐家橋後砌水從此

入行春橋雙峯插雲碑亭在兩橋間

澗泉曲曲翠重重夾路青山九里松一片行春橋下水分明雲影插雙峯

西泠橋

孤山西北盡處一名西泠一名西陵一名西村

嬉春遊女照清波烟柳長條一棹歌行近西泠橋畔路蘇娘墳上落花多

玉帶橋

在金沙隱雍正九年李敏達公建

碧檻紅闌雁齒排祠園正對畫橋開紫裘烏帽知宜稱彷彿談禪太傅來

斷橋

在孤山路口唐張祐詩斷橋荒蘚合元錢惟善詩阿奴家住段家橋宋名寶祐橋

長隄新柳舞纖腰
淺碧湖光動畫橈
一片落英荒蘚路
斷橋原是段家橋

涵碧橋

在白沙隄宋陳堯佐建明孫隆重修改名錦帶橋再西卽孤山與水仙王廟相近

紅亭倒影水中央
垂露梧桐滴晚涼
涵碧橋頭更西去
寒泉來薦水仙王

學士橋

在清波門湖灣卽宋聚景園故址亦名夾字橋以湖水委輸故若夾字名夾字港也

貰醉誰尋酒姥墩
城西流水匯橋門
瑤津錦壁俱黃土
何處當年聚景園

長橋

在錢湖門外宋淳熙間王生與陶師兒雙投於此亦名雙投橋錢湖門今塞

雙投何處問漁家
蕩漾香魂月色斜
記取扁舟橋畔泊
滿湖秋影白蓮花

玉鉤橋

在靈石山玉鉤澗上元張伯雨賣玉鉤所建

一角疎林黃篋樓鵲灣聽雨正清遊夕陽秋樹橋邊路猶

有行人話玉鉤

石函橋

在舊錢塘尉廨西德生堂側一名西石頭橋唐李泌建有水閘洩水以入下湖白居易

易錢塘湖石記所謂北有石函南有窰是也

石函水引鏡波明終日奔雷響未平便作出山泉亦好一

般霖雨潤蒼生

潛園漫士歌贈琴鵬

隨園藏園人中仙高風在世不可攀詩壇寂寞三十載遺稿鄭重畱人間海內作詩誰健者斯人當之肯居下千秋一卷是程堂韓白蘇黃共醺冶名場宦海夙所兼烟霞癖

疾心神恬鶴書屢下催不起高臥祇向潛園潛潛園在何處乃在吳山麓開門正對螺子峰綠陰萬樹環華屋潛園昔何所乃在南湖潯小池拳立鷺君石黃葉滿地鳴疎林皋亭桃花源孤山梅花嶼散花灘畔樓秋雪巷前路古來多少詩人住雲山烟水堪潛處君爲四水之潛夫著書應亦名潛虛漫郎漫叟皆我徒更吟退谷遊杯湖

同人聞余營湖園書櫟相寄賦此答謝

懸橈何勞苦仲將蔣家三徑未全荒多君梁鵠新碑貽我盧鴻舊草堂學佛幽居營輞水飛仙妙墨指雲房

字相傳爲鐘離權書

漢陂兄弟同居好聽雨來尋局脚床

玉鱸雙澗雪歌

玉鱸三澗雪仙人李八百妹明香真人真多山中
童子所歌也其詞不傳張玉娘酒鱸在靈隱合澗
橋畔南北兩澗水自戶外過釀酒煎茶汲飲於此
作玉鱸雙澗雪歌

明香真人青城仙青蘭壓髻花滿肩山中處處幽澗泉
珠濺玉鳴秋烟靈隱山前沾酒肆松外一宿颺山翠青裙
縞袂學當鱸不解蛾眉遠含睇南澗天門下北澗龍門來
合澗橋下波灤酒酒鱸恰對雙澗開澗花紅澗苔碧澗葉
黃澗雲白溪女浣花踏澗石松蕾作薪烹窰舌靜聽春淙
待明月兩澗何如三澗雪

桃花漁隱篇自題小影

春山染黛明霞靄一片春波漾春影結蘆解近美人湖笑
指桃花號漁隱門對桃花岸路轉桃花隄桃花雨細流鶯
啼漁舟引入桃花溪花露壓蓬蓬背重花氣入船香酒甕
船頭醉擁綠蓑眠花片吹來驚午夢雙鬟漁婦雙髻嬌
漁娃桃根與桃葉雙頰皆桃花朝弄桃花烟夕浣桃花月
桃花在水漁竿直釣來一一桃花鰕魚柳處處桃花村漁
莊隱隱桃花墩桑麻雞犬仙世界西湖卽是桃花源曉隱
何人知隱趣畫裏桃花千萬樹前身合是武陵漁一生祇
傍桃花住

褚家塘訪南宋瓊花園址

揚州后土祠瓊花天下無二本歐陽公守揚州曾

建無雙亭花絕類聚八仙色微黃而有香宋仁宗
慶厯中嘗分植禁苑明年輒枯載還祠中敷榮如
故獨醒雜志云宣和間起花石綱因取至御苑逾
年不花乃杖之遣還其地淳熙中壽皇亦嘗植南
內逾年憔悴無花仍送還之其後宦者陳源命園
丁取孫枝植聚八仙上遂活其色香則大減矣杭
之褚家塘瓊花園是其遺址地卽春秋慶忌宅故
基也事見周密齊東野語褚家塘亦名瓊花街以
此攷之南宋時杭州種瓊花者甚多集芳園在葛
嶺上宋張婉儀別墅有玉蕊堂植瓊花茶蘂後以
賜賈似道爲後樂園史彌遠有瓊花園在葛嶺後

亦折入賈似道宅宮中春暮則稽古堂會瀛堂賞
瓊花見武林舊事陳氏書錄解題瓊野錄一卷學
士洪邁記述園池題詠曰瓊野者從維揚得瓊花
植之而生遂以名圃宋人詞詠瓊花者大抵皆杭
州之瓊花也今揚州之瓊花已無遺種杭則尚應
有之聚八仙其別支也陳源卽癸辛雜志所載聘
菊夫人居適安園者按瓊花雍錄以爲卽梔子花
王荊公改爲山礬花野客叢談以爲卽玉蕊花宋
王元之改爲瓊花瓊花之名始見於歐陽公無雙
亭記花之香色向無確詰澠水燕譚錄以爲卽李
文饒所賦玉蕊花七修類稿云宋畫瓊花似野八

仙但多一頭九朶簇成其說不一歐陽公或亦作

宋子京也

瓊花畢竟何年種曾傍仙人玉勾洞玉樹瑤林后土祠無
雙亭上春如夢禁苑春風萎翠鈿趙家往事總如烟仙姿
招得花魂返記取仁宗慶厯年後來南渡移南內湖波澄
碧山橫黛壽皇宮殿最清華根葉一樣憐憔悴妙手移春
聚八仙當年好事說陳源不須重話蕃釐觀此地瓊花有
舊園梁州妙舞誰宣喚有人領袖仙韶院紅顏對食菊花
新適安園裏應同玩管領揚州幾度春廣陵仙種已成塵
一枝畱種錢塘路我憶飛瓊夢裏人

寄姬人雲婉

兩字娉婷一字嬌雲鬢新與綰垂髻麻源仙女原纖爪楚
國宮人是細腰雙袖落花晨擁帶滿身涼月夜吹簫年來
慣作閒情賦英氣清愁爲爾消

家妙雲女史

徽曾

隸書楹帖贈余曰家住癸辛街畔

詩名丁卯橋邊以余家近南宋周公謹故居於詩嗜
許丁卯也喜其雅切賦此答謝

香奩彤管墨雲舒銀榜雙題映綺疏玉局仙人思構宅金
釵弟子自工書中唐橋隸詩家派南宋城坊處士廬珍重
簪花貽墨妙滄江虹月夜窗虛

西湖兩女士詩贈汪逸珠家妙雲

屏翠開奩波鏡綠雙峯雲影明湖曲仙山金粉盡烟霞名

閨羅綺皆冰玉湘濱游女洛川神冰玉烟霞總絕塵香塚
新營三女士玉臺重見兩佳人第一佳人汪逸珠沅蘭小
閨月輪孤天涯信斷微雲堦獨處青谿說小姑同時才藻
崇蘭閣珊瑚硯匣橫珠箔此是吾家小彩鸞文簫佳偶靈
簫約一爲畫史一書家斑管同開五色花東國才人許蘭
雪西池仙女婉凌華君不見衛夫人簪花書格臨池擅又
不見楊妹子倚香粉本深宮玩爭似逸珠繪事妙無倫金
碧樓臺隱暮雲妙雲隸法亦通神鸞鳳飛騰倚夕曛汪爲
吾戚陳吾族舊家同在青山麓脂碗瓊綃展畫樓香霏銀
榜明華屋墨會傳觀鏡檻歎碧城十二曲闌干始知翰墨
因緣侶都作神仙眷屬看十年領袖華嚴界墨琴書法雲

門畫更有蘭闥後輩賢開函真欲焚香拜蛾眉壇坵古今
無絳帳金釵好畫圖玉女桃花新婦石西湖原是美人湖
佩珊將旋雲間過訪湖樓有詩見貽賦此奉答

我正秋聲聽故鄉君因羈思泛歸航一隄烟樹羅裙濕小
閣雲山翠袖涼閒詠青蘿依古岸靜看黃葉下斜陽尊前
莫更談天寶惆悵麻姑髻上霜

金夫人歌和張紫峴

宋慈元后女赴海死土人義之鑄金身以葬因號
金夫人塚今在新安海濱吳橡村有金夫人歌紫
峴有絕句書後夫土人知公主之義鑄金以葬則
元師或尚未至厓山也公主知事不可爲湛身明

志足與慈元之沈後先輝映此事雖正史失載而
大節皎然實足增天水三百年宮闈之重余議於
鳳皇山立慈元之廟公主宜祔祀焉

黃金鑄骨兼鑄心帝女抱石虞淵沉精衛夜啼湘竹裂黃
泉埋玉先埋金錢塘潮落天心改誓比六宮先蹈海貞心
勁節女兒身銀漢天孫避光彩扶桑花落悲秋墳綱常萬
古惟君親甲子門前十萬衆忠孝能激諸將軍招魂欲採
幽蘭薦美人虹起馳飛電鳳皇山下故宮花他年配享慈
元殿

題烟蘿子春淙靈鷲圖

雨澗春淙一靈鷲翠嶂青林隱深秀坡仙去今知幾載妙

句猶傳天竺後烟蘿畫筆坡公詩乘興揮毫一寫之勇翠
飛丹出樓殿白雲隔斷青參差北澗龍門來南澗天門下
閒聽秋聲坐石橋龍謁潺潺日東瀉靈鷲何年始飛來呼
猿清梵松聲哀湖山大好不飛去玲瓏石骨生春苔君寫
此圖得佳趣青壁丹崖好雲樹覆澗蘿陰六月寒徑欲冷
泉亭上去此圖君爲天潛作池館蕭閒寫林麓繪水居然
解繪聲紙上分明響寒瀑我昨探源青山巔芒鞋踏葉尋
秋烟幽淙嶺險石門峻樵徑開鑿知何年幢影鐘聲隔蒼
巘一徑巢构知更遠詩中有畫畫中詩七字分明寫靈苑
我別家山今幾秋他鄉無此好林隈隱君憩館眠雲處一
盦長懸作臥遊

題潘功甫秋柳詩後

一灣輞水尚淪漣，湖館新營葛嶺前。添種門前五株柳，西

風吹動亦娟娟。

余新營翠淙園於葛嶺，卽小輞川舊址也。

白隄對面影參差，曾築香泥種幾枝。不寫春痕寫秋影，小

青墳畔雨絲絲。

去年爲小青脩墓孤山，今春於白隄補種柳樹。

髩絲蕭瑟不堪攀，流水棲鴉靜掩關。明月吹簫樓一角，瞋

烟何處舊湖灣。

議建明月吹簫樓於湖灣，元士女曹妙清故居也。

濃粧洗淨冷烟蕪，何處紅樓憶姓蘇。眉影更纖腰更瘦，天

然宜稱美人湖。

七代詩僧精舍歌

一代詩僧一代佛，七佛傳燈付巾拂。琅嬛慕道不慕禪，獨

頤道堂詩選卷二十二

古

向空山題寶月顛翁老作山中僧萬峯深處攜紅藤梨花
春甕竹葉釀醉鄉但解傳詩燈鐘後月前明不斷南屏從
深處一詩燈琅環句也
來詩理通禪理雲在青天月在水金粟如來是後身除却
青蓮誰解此我亦誦經三十年以禪証詩詩証禪珊瑚寶
藏萬龍女捧花香散華髮天南山北山傳幾派此地依然
精舍在前身我是壑菴僧說法別開詩世界

龍尾山人歌弔邵夢餘

不作龍頭作龍尾名士如君斯可矣一廬家在鏡湖西高
臥臥龍山翠裏名場宦海三十年紫裘烏帽如神仙新詩
天矯有龍氣欲噓雲霧騰青天明珠按劍無顏色龍性可
憐馴不得六丁雷電下取將詩卷飄零劫灰黑吁嗟乎鷄

尾亦可斷魚尾亦可燒中郎之琴焦尾焦歸來皂帽晚渡
遼采蘭志北里把酒悲南朝弄黃樓之長蘧吹赤壁之洞
簫摩挲龍角囊龍腰如花龍女不可招何人雪裏圖芭蕉
君又字蕉 嗚嗚小海生寒潮
雪故云

答湘姬見詢湖上近游

畫樓遙對一峯孤行李安排入畫圖蘋葉風波漁嬾舫梅
花烟月美人湖蕭娘酒肆臨流見宋嫂魚羹隔岸呼陌上
香車橋下舫髻眉頗覺似卿無

題金壽門仿白玉蟾畫梅

一枝兩枝春窺檐千點萬點香生縑疑有明月來疎簾誰
寫此者白玉蟾寒苔滿地盤梅根繁花滿樹招梅魂疑踏

殘雪尋水村誰仿此者金壽門彼梅之樹花之逸此畫之
人花之匹武夷散人稽留民同此寒香一枝筆近爲梅花
營丈室忽思學仙不學佛學佛須證梅花禪學仙但飲梅
花泉縱筆更寫梅花烟畫成卽是梅花仙不然喚我梅花
顛

題丁龍泓臨石門僧畫梅

畫梅如畫鶴宜瘦不宜肥高士小茆屋枯僧破衲衣野橋
霜沒徑溪寺月穿扉掩冉松篁外幾枝橫翠微

汪逸珠女史臨辛貢粉梅長卷

一丈鵝谿絹繁枝滿幅開勞將天女粉寫此玉堂梅斜榦
香凝蕊圓紋翠點苔暝烟疎院落澹月小樓臺老鶴閒相

守樓禽夢不猜廊腰香雪海屋角白雲堆
綈袂憐消瘦銅瓶妙翦裁松篁新眷屬桃李舊輿儻
畫梁攜琴去空亭步履來寫花如寫影闌閣此仙才

西馬塍見古梅懷姜石帚

馬塍西畔梅花路春來徧是梅花樹彷彿詩人舊草堂
曾與美人吹簫處自琢新詞韻最嬌美人吹簫客吹簫翠尊
瑤席圍香雪家在錢塘第幾橋玉龍何處吹哀曲無復飛
香點蛾綠江北江南想珮環花似嬋娟人似玉西湖寒碧
暝烟遲籬角黃昏見幾枝水磨依然舊明月暗香疎影更
填詞

湘鬟水榭梅

半下紅羅幕斜通綠綺窗
春人與花蕊照影各成雙
神女雲爲夢仙人玉鍊顏
折花人絕世鏡裏惜雙鬟
月上小樓西疎影闌干亞
小坐詠寒香題作梅花榭

吳蘭雪中翰擬卜居桐江九里洲以梅花村舍圖索
題用東坡松風亭下梅花詩韻二首

青山碧水梅花村暗香疎影梅花魂
花三萬株亘九里宜曉宜晝宜黃昏
梅影中書詠梅客新田十憶懷鄉園
盛名海內三十載詩格不數李與溫
鸞岡寫韻願未遂空有歸夢慵朝瞰
逕思此地置茆屋花枝多處安樵門
知我西溪學漁隱寄書說與梅花言
何年同訪釣臺去桐江月上窺清尊

我近卜居古蕩村近與樊榭招詩魂浴山梅花十八里西
溪月上浮黃昏葛鵲西頭好林麓小有一角梅花園闌中
解寫喜神譜消受茶熟兼香溫花間無事日高臥重衾
夢春溫瞰老鶴無聲翠羽寂夜深花影橫柴門君歸倘過
湖上路話雨來聽漁樵言埋香小塚隔湖見更與寒食傾
芳尊

梅莊探梅

蘄王舊園子梅樹有精神明月猶前代青山孰比鄰清涼
一居士婉嬾四夫人蘄王妻四人我亦騎驢者空林問早
春

北澗見梅

北澗山之幽人家閉柴關偶見古梅花掩映松篁間幽淙
下絕壑石齒聲潺潺欹笠野樵去洗鉢枯僧還翠禽啼復
歇飲啄殊自閒坐久暗香得滿目惟寒山欲上巢枸隄青
山更幾灣

白雲峯下梅

分明香雪海掩映白雲峯花氣暝無際翠烟深幾重斷巖
懸凍瀑古寺遞寒鐘一路莓苔迹惟應野衲逢

連日探梅孤山西溪花已漸放惜將解纜不及待曼
香春霽也詩以畱別

孤山梅花三百樹疎影橫斜不知路西溪梅花三十里一
半花枝臥溪水昨日探梅孤山巔綠珠破萼橫春烟今日

探梅西溪邊交枝香壓鷓鴣船萬橫香雪花魂冷一抹春
痕花夢醒水底看花花更佳不見花枝見花影孤山梅嶼
成梅村西谿花海通花源沈沈州窩低柴門娟娟月色浮
黃昏嗟我行將近烟鳥別花更覺花枝好銅笛橫吹鄧尉
遊應憶西泠夢春曉

梅花夢歌

余性愛梅花屢形夢寐比以閒居益耽幽寂晝則
梅花之榻聊當蒲團夜則梅花之帳伴茲布被塵
心既淨佳夢益多或古徑空山冷月挂樹或板橋
幽澗殘雪當門恒與古衲飛仙徘徊暗香疎影中
殆無夕不作梅花之夢也系之以詩

羅浮山中梅花苔遊人盡爲梅花來我曾一見梅花開銅
坑山下梅花路人家都有梅花樹我來正泊梅花處西溪
舊種梅花田西湖閒泛梅花船柴門開近梅花邊草堂正
結梅花前暗香白煮梅花泉疎影靜寫梅花烟一株綠萼
梅花碧千林玉蝶梅花白孤村人靜梅花雪空山夜冷梅
花月美人粧罷梅花額故人書寄梅花驛雙棲翠羽梅花
仙三生白石梅花禪前生定結梅花緣有人喚我梅花顛
醉中祇抱梅花眠醒來但草梅花篇荷鋤到處梅花種彈
琴還作梅花弄烏啼霜冷梅花凍百年一覺梅花夢

鴛湖女史沈采石以余將北行爲寫西冷舊夢圖曠
逸空靈深得餐霞飲淥之致攜之行篋勝對韓陵一

片石也各系以詩

天門攬雲

天門山在鄱當嶺上
爲南北兩山分界處

平地望天門空翠出雲表褰衣上絕頂雲影殊縹緲湖上

百廿峯雲外翠簪小

澄湖泛月

兩湖不如遊月湖澄波夜泛湖心一亭
真白香山所云蓬萊宮在水中央矣

月湖勝雨湖澄波漾明鏡畫舫破烟來逢背月華瑩誰家

夜吹簫招我月中聽

龍蹻玩泉

卽龍井也在風篁嶺下幽澗琤琮
盤石臨流爲湖上諸山最幽勝處

千尺飛雨急一斛鏘珠圓玉醴三澗雪玩此山中泉嫺雲

不出山龍臥秋潭烟

鶴靜聽雨

浴鶴澗在赤山步
張伯雨舊居在焉

金茵閣已蕪玉鉤橋亦圯何如浴鵲灣小軒隔烟水臥聽
秋雨聲烟鬟澹梳洗

鷺峯銷夏

卽飛來峯岩壑玲瓏林木幽秀冷泉一亭俯鑒澄碧正武林志所云北澗水浸

飛來峯
趾也

鷺峯本飛來冷泉在其下一鏡瑩澄波寒碧浸臺榭亭外
松風多六月此銷夏

鶴渚尋秋

西溪河渚一名鶴渚碧蘆紅樹寸寸秋色

鶴渚卽河渚溪流知幾折我有舊漁莊交蘆境清絕閒招
老鶴來隔烟踏秋雪

松嶺採芝

湖上諸山多松踏雲采之恆得延年之藥

嶺上松陰橫嶺下松根直松根有靈芝服之美顏色却老

更延年歸獻老親側

柳隄種樹

白蘇兩隄桃柳漸
稀輒乘春雨栽之

桃花春色嬌楊柳春陰重長橋復短橋幾樹手親種待攜
斗酒聽流鶯隔烟啼

簫樓倚玉

元女士曹妙清故居在湖灣湖上諸山
綠翠環碧擬建明月吹簫樓為女士題

詩謠集
之所

當年曹比玉解賦董嬌嬈家在西湖上南山第一橋高樓
明月裏何處聽吹簫

梅嶼埋香

楊雲友墓在智果寺西菊香小青墓在
孤山次第修復并營蘭因館於巢居閣

左上為夕陽花影樓左
為綠陰西閣右為雲龕

湖雨湖烟外春山玉女墳梅花三百樹樓閣倚斜暉一樣

蛾眉月重來弔紫雲

紫雲小清女弟也

壑菴招隱

壑菴在南屏山麓余前世爲菴中僧

前身菴中僧今向菴中過巖前老松樹蒼皮十圍大更憶

招隱人聽雨對牀臥

謂松壺子

葛鵲移家

翠淥園本小湖川舊阻在葛嶺麓正臨後湖與孤山巢居閣相對

昔聞葛稚川茲山棲隱處我營湖上居恰傍君家住湖翠與山淥染我園中樹

水樂洞

水樂洞中聽水樂細合宮羽大徵角巨如鐘鼓振靈韻遠若笙簫招驚鷺或如帝子湘靈瑟江上峯巒隔縣邈或如成連水仙操海上波濤湧山嶽乍疑子建經魚山泠泠仙

梵飄雲桷又疑仙人譙幔亭嫋嫋餘音繞華屋石鐘山下
響曾吟彈琴峽底聽瀉潄果然山水有清音水樂清勝山
樂濁峨嵋詩與華陽書飲淥餐霞誰可學賈相園亭蔓草
荒楊王別墅莠苔剝山僧來往不知年不墮聞根心不覺
重來欲譜幽澗泉有約春林采香藟

翁家山

九溪發源處幽澗響玲瓏山路茶田外人家桂庵中松陰
凝曉碧楓葉下秋紅丹井今何在還勞問葛翁

芭堂稚韋兄弟待余烟霞寺午飯

芒鞋信步踏烟霞來過空山老衲家大好茆茨容憩息本
來蔬筍最清華澗邊碧浣纔挑菜林外香生正煮茶野藪

隨緣堪一飽漫勞洗手摘藤花

烟霞洞

烟霞寺後烟霞洞洞外幽森洞中空老僧處洞若處室遊
人入洞如入甕幾行綠樹長守門無數白雲閒宿棟中間
十八老尊宿羯鼻虺肩貌殊衆聖跡始因神示兆異事更
徵王感夢何年巧匠斲山骨龍可擾馴虎可弄菩提不藉
北秀偈阿羅曾許東坡頌丹元五采結仙芝玉髓下垂鍾
乳凍洞門一墪立斜陽墪上千官記南宋杪穠種自攝山
來聊向洞前親手種洞中白石臥老龍洞外青山翔碧鳳
上山曾有翠微迎下山還勞黃葉送穿林更訪佛手巖一
路松陰壓衣重

九溪十八澗

九溪十八澗滿地是秋聲
筇杖拖烟重芒鞋踏雨輕
鳥依寒衲下鹿傍野樵行
我亦忘機者閒鷗有舊盟

清涼亭

大好清涼境青山况晚寒
暝烟沉遠磬空翠壓疎闌
摩籊招黃鶴橫琴憶采鸞
麻姑話滄海他日託仙壇

法雨泉

法雨長如雨南山此一泉
細飄林影濕輕滴水紋圓
松風噉殘雪竹禽啼冷烟
老僧閒試茗相與話琅嬛

三字爲雲臺師所書

松顛閣觀許玉年壁上畫松

松顛閣外千株松黛色都染嵐
烟濃閣中兩樹更奇古兀

立素壁撐長空寫松到今知幾目滿壁雲烟猶帶濕不知
是墨是松陰元氣深凝根下石泰山頂上秦松枝我昔岱
遊曾見之棲霞嶺北松更奇亦與此樹同支離羨君下筆
堅如鑄畫松一似真松樹僧言昨夜牕未關老鶴飛來踏
空去

女弟子顧螺峯邵老友西梅處士女也爲余寫金釵
問字圖極綺羅金粉之致因題四首

廿年蹤跡感名場小錄何人續夢梁到處碧成貽篆印幾
家金綫織詩囊平原勝買千絲繡昌谷勞熏百和香肯費
丹青寫衰朽畫師誰是顧長康

分明貌山紫髯翁人在香圍翠繞中入室譚經花蘊藉登

樓比誠月玲瓏彩鸞問字書應好紫鳳評詩句最工玉怨
瑤情舊都講絳帷遙隔萬花紅

金粟如來是後身維摩丈室靜無塵散花誰證拈花果立
雪偏多詠雪人爲我筆牀安翡翠抵他詩閣畫麒麟門牆
桃李應相妬低首湘娥與洛神

班管殷勤寫鐵崖閨中妙手亦金釵筵前奉雉紅粧並門
外修羊翠袖偕花月湖山開玉局綺羅環珮擁瑤階他年
小輞川中住張向山巔與水涯

後西湖兩女士詩爲吳蘋香顧螺峯作

去年來賦兩女士湖山傳唱汪

琴雲

與陳

妙雲

汪也畫筆

妙絕世陳也隸法能通神今年來賦兩女士閨閣爭傳吳

與顧吳也珠玉應宮商顧也丹青託豪素君不見香奩詞
人推擅塲昔爲漱玉今生香花簾新製寫瑤怨妙解北宋
追南唐玉臺畫史凡幾輩長洲仇與錢唐戴仇英戴文進女皆善畫

金粟維摩顧虎頭點染生綃傳粉黛顧也畫物不盡人破
格爲我一寫眞雲鬟翠鈿好顏色鷗波橫遠招停雲吳也
工詞並工曲解撥哀絲理豪竹霓裳法曲譜蘭因花影小
樓人似玉我別西湖二十年無端又作出山泉絳紗無恙
青山在惆悵詩禪與畫禪新詩傳寫三千首紅粉青山同
不朽那得才人福慧兼沉吟怨耦還佳耦一樣青溪兩小
姑嬋娟都住美人湖倩他玉女生花筆同寫金釵問字圖

鸞尾花初散蛾眉月易沈畫樓春寂寂芳樹夜陰陰鵲影
埋香鏡蟲絲罥綠琴金鑾鐫紫石腸斷樂天吟

衛鐸畱新譜郝璿出舊家仙娥寒弄影美女曉簪花松閣

題殘照梅亭寫落霞湖山佳麗地翠墨悵橫斜

妙雲曾於松顛閣書

檀帖余修菊香小青雲友墓碣皆妙雲代余書

道韞吟春雪容華賦曉粧吾宗憐少女臣叔魏中郎月魄

嬋娟影雲鬢弟子行崇蘭高閣在淒絕隕秋霜

花海以蒙泉書花集二字易余詩集

花影芳園小結廬松顛高閣舊巢居就鶯求友春長好與
鶴平分地有餘誰換硯山招海嶽好尋睡譜入華胥吟紅
刻翠三千首換得蒙泉兩字書

自九里松晚歸陸氏莊

蘇隄行向盡還向白隄行漁火分遙浦齋鐘遞遠聲林烟
沉晚寺湖月浸春城花壓柴門路休令宿鳥驚

漁娃梳頭歌

漁家每先鷗鳥起湖面白烟徐入水十三嬌女學梳頭紅
拂殘花還自理柳絲蘸水花露香娟娟殘月嬌鵝黃微波
鱗鱗魚出水隔浦尚宿雙鴛鴦盤盤輕解青絲膩不作雙
鬟作雙髻粧成祇自照春波那得玉臺明鏡麗窓外垂楊
喚曙鴉紅樓何處美人家香雲枕上壓殘夢嬌靨微開笑
落花

雨中泊西泠橋

西村烟泊釣魚槎樓閣溟濛第幾家水鳥橫飛一湖雨山禽驚落半巖花橋邊漠漠紅闌遠隄上陰陰綠樹斜好待晚晴開畫障遠聲吹月上明霞

留別西湖

鷗波舊侶羨吳興輞水新居愛右丞

翠淥園卽小湖上浮

家移畫舫山中招隱策紅籐三秋聽雨經龍謁一路看花到馬塍惆悵琴臺西去路前身原是壑菴僧

千林挹袂萬花扶爭識青山舊酒徒楊柳兩隄春繫馬

上年

於白蘇兩隄種柳

薜蘿三塚夜啼烏

謂菊香雲友小青山墓

翦紅刻翠新闌

詠

西泠園詠五百首古今宮闈畧備

飲淥餐霞好畫圖雲影波光俱絕世

西湖原是美人湖

廿年鷗隱悵離羣
經歲烟波影又分
葛嶺辰樓低暮雨
泰亭丙舍隔斜曛
歸田有約思平子
誓墓無書媿右軍
羨煞在山泉水好
那堪又作出山雲

珍重觥船放棹遲
千巖萬壑寫相思
菰烟蘆雪三生夢
山翠林香一卷詩
虛有菰鱸畱後約
可無梅鶴問歸期
西溪大好漁磯在
乞與紅衣畫釣師

崇明施樸齋孝廉

彥士

鄞謝寄梅上舍

占壬

皆余上

年議海運客也以不見用散歸鄉里今附海舶入都
書來話別詩以送之

借箸更番議徙薪
賈生才畧總無倫
已從置散投閒去
空作乘風波浪人
臨賀故交書鄭重
敬容殘客語酸辛
輕裝

我亦春明客析木西頭好問津

哭孫古雲襲伯

相門才子舊金貂辛苦龍樓侍早朝一品勛階辭棨戟五
湖歸計狎漁樵遂初有志成高隱遠別無端賦大招回首
太平湖上路禁城暮雨又瀟瀟

十年蹤跡寄吳門一角蘇臺作謝墩功甫清遊多俊侶晉
卿雅集有名園雲邊雁斷人千里花裏鶯啼酒一尊我亦
淮南舊賓客不堪風雨憶黃昏

臯亭雲樹冷棲鴉靈石樵歌入暮霞別建叢祠因守塚新
營畫舫當浮家眞烟靈竺三生石細雨蘇隄萬樹花溪上
耦耕虛有約交蘆巷外夕陽斜

座中兄事媿袁絲心跡生平我所知晚翠寒香雙玉女詞莊
閨雨春華秋實一佳兒高情合補蕭琛傳獨行誰書郭泰
碑三十年交千萬語爲君揮淚更題詩

蓮花博士歌寄吳蘭雪

蓮花博士今仙才新詩亦似蓮花開仙家月得百壺酒風
裳水佩環樽壘前生陸放翁今生吳季子折花吟煞鏡湖
秋一一紅蓮嬌綠水色是蓮花色香亦蓮花香非烟非露
非繁霜夜月浸花花氣涼蓮花放後梅花放詩名傾倒雞
林相橫經侍子讀君詩詩與梅花同供養雛姬畫竹兼畫
蘭五銖仙袂飄珊珊如花美眷秀可餐秋心恍惚乘飛鶴
一片碧雲花萬朵中有白鷗閒似我莫將博士換中書謫

仙畢竟青蓮可

董琴涵琢卿兄弟朱酉生潘功甫孫子和戈順卿沈
芷橋顧夢香曹稼山家小松餞余鷗隱園賦此畱別
烟波同是白鷗羣惆悵離亭酒易醺七子賦詩聊寵武干
秋著錄互論文盈虛有定平池水舒卷無心出岫雲燕柳
江梅定相憶重來還與話宵分

畱別諸姬

和風麗日好襟懷似爾佳人海是佳因近中年長謝病爲
憐遠道更持齋蓮花會上拈紅袖桃葉舟中惜紫釵珍重
芳心似明月春帆隨我到天涯

靜初

別愁容易上纖眉不盡離懷付酒卮病後最宜調藥餌倦

來切莫理機孫消閒好仿簪花格破悶休吟折柳詞惆悵
滿襟清淚在江波難浣是相思

湘霞

原是桃根最小身蘭芽玉蕊共芳春聽求燕語初愁別畫

到蛾眉畧解顰說法長依善天女

從靜初學佛

學書好傍衛夫

人

從小韞學書

自調寒暑安眠食莫爲征夫怨苦辛

雲姬

錦字三年悵遠遊美人春夢共蘭舟珊瑚枕瘦孤鴛冷玳
瑁梁空乳燕愁寒雁櫓聲過鏡檻亂鴉帆影拂簾鉤陌頭
楊柳傷心色莫更凝粧上翠樓

玉嬌

畱別吳門

江南花月有情天手板腰輿二十年驥老名場安夜櫪鷗
閒宦海避春船看山畧寄烟霞興載酒頻畱翰墨緣洛下

園林觴詠地樓臺無數畫闌前

麗娃鄉畔寄蝸廬燕國橋邊又卜居何處棲鳥仍畫戟幾

番行馬換高車一編待續河渠志

余治河議十餘篇三策河渠答問四卷

空留海運書

海運凡三議之

過眼浮雲看未了依然松月夜窓虛

書法何曾學右軍閒情聊復寄司勳殘碑自訪金姬墓

元末

章邱李素女字金兒居張吳宮中多異跡封洞元護國仙

妃墓在虎邱管家瀨余有書楊夢羽金姬傳後及金姬事

畧擬爲修香土親營玉女墳

余在常熟修菊香小青楊雲友墓墓又修菊香小青楊雲友墓

於西湖闔閭女勝玉夫差女紫玉皆葬虎邱爲修墓且建祠

畫舫一尊邀聽雨高樓八

表話停雲春風桃李羣芳譜

武林女弟子汪逸珠許雲林吳蘋香顧螺峰陸湘鬟李蘋

仙華共卿黃蘭卿蕙卿家妙雲吳門女弟子王仲蘭辛瑟

嬋吳飛卿孫芙裳張雲裳呂靜仙錢蓮綠家友菊黃蘭姬

張鳳姬曹小琴范湘馨吳飛容于蕊生

史琴仙張蘭香書畫並擅一時之秀

爭乞羊欣白練裙

春陰如夢雨絲絲惆悵蘇臺折柳枝遠道祇攜先友集謂
山舟奚鐵生洪雅存孫淵如楊蓉裳吳穀人王惕甫秦小
峴彭甘亭吳澹川張船山趙北嵐吳枚菴舒鐵雲王仲瞿
樂蓮裳劉芙初錢謝菴邵夢餘贈行不少女郎詩諸公文
蕭子山王井叔家勇生諸君集
讌勞相憶潘榕皋石琢堂齊梅麓謝椒石七子騷壇我所
思兄子裴之先與王井叔朱西生沈問生潘功甫彭詠我
和吳清如韋君繡結祖賦詩余定為吳中七子又以孫子
子王二波葉若生沈式如沈蘭如陳小松喬鷺洲劉小春
為續七子畢子筠顧春洲顧子兩程藩鄉畢石卿黃友蓮
蕭晉卿為廣七子仲子湘石鶴笙黃飲漁潘覺夫保生星
齋敘庭為新七子伊墨卿題余檄榜曰七子詩壇千里征程三月別重來還與好
風期

畱別秣陵

六朝城郭賸棲鴉問訊橋南賣酒家商女春聲金縷曲宮

人秋影玉鉤斜千年古井鴛沉瓦幾處殘碑蝶夢花苑樹
蕭條陵葉盡更無人解說芳華

一曲青溪舊板橋秦淮流水石城潮高樓聽雨昏銀燭水
樹停雲咽玉簫照影池花嬌笑靨銷魂宮柳瘦纖腰鶯鶯
燕燕曾相識月落烏啼夢未消

彷彿修書蠟炬紅南朝遺事付雕蟲微吟花月春陰裏懷
古江山暮雨中幾輩玉臺斑管寫誰家紅袖碧紗籠秣陵
一集傳鈔徧半是雲龍半雪鴻

早辭簪紱慕邱園有客當年奉壽萱五畝自營陶令宅全
家安住謝公墩松陰客散林間墅花影人敲月下門遲暮
出山吾有媿春風吹綠鬢霜痕圓

詞隨

揚州弔汪劍潭先生

老輩晨星感逝川元亭重過一潸然早年詞賦金荃尉晚
歲聲華玉局仙槐市舊遊曾載酒虹橋春稷憶傳箋我來
更乞遺編寫滿地秋花暗暮烟

畱別揚州

三年承乏古江干政拙多慚事未完能吏何如循吏好化
民原比治民難衰容無恙人猶識輿論雖公我未安溝洫
早修隄早築莫忘潮汐有驚湍癸未夏江水泛濫沿江百里田廬淹沒甚衆擬仿范公築隄以節家未果

何幸甘棠去後思多情父老或無私野人尚供長生籙公
案猶鈔讞獄詞無名氏譔陳公案多記余讞獄事不盡實也香篆藥丸消疹法

壬午歲以千金製藥徧置城
鄉適秋賦以八千匣置貢院
儲糧蘆屋救災詩癸未水捐

更畱一曲伊婁水分與蔬疇菜甲滋
開通江新河以濟行旅且資灌溉卽唐齊

河也
伊婁

此邦人士故多賢況有師門尺五天絳帳橫經依甲第青

璫負笈憶丁年琅嬛館啓牙鑿富福壽庭開翠墨鮮福壽

雪臺師新居奉幾度周璆容下榻玉梅花影漾春烟余館

往來邦上於茲假館
庭前多梅頗助吟嘴

烟江放棹渺天涯一路春風覽物華綠徧宮牆曾種樹壬

修學宮種樹紅深庭院舊栽花縣齋玉樹堂前詩人短碣

今漸成陰矣憐新塚謂凌豪士長干失舊家祇有翠屏洲上客肯畱殘

墨爲籠紗謂王
柳村

留別袁浦

袁江春水碧於天，記傍清淮住幾年。末議曾邀

前席聽

嘉慶丙寅將改海口浙饒使常公以余所陳難改情形上

聞乃得復舊

虛名空與世

人傳殘編檢點殘尊後，短髯蕭騷短榻前。極目雲梯關下

路，萬行楊柳綠生烟。

嘉慶丙寅曾預海口濬河之役

往歲還勞借箸籌，桃花浪急送歸舟。不行海運艱河運，遂

使清流誤濁流。

上年議以黃助清以清濟運及駁運海運並行皆爲任城相國所許掣肘難

爲經國計，盟心幾蹈破家愁。征車帶色蒼茫裏，回首恩門

感未休。

敢言史志熱河渠畧有藕蕕一得愚，沙不增高但增遠。涵

惟宜，迅不宜紆。別營五壩高加堰，

舊有高堰另建五壩議

莫阻雙流。

碩項湖

碩項湖卽碩莪湖爲蒙沂二水入海經行但得虛地不能築隄故減壩但可減漲不能改道

懷還獨斷茨防竹槌總良圖

全局分明在算中名臣經濟貴和衷須知岸盡隄方盡

接

長隄束水攻沙雖係疎言實爲良策

要待河通漕始通民莫當衝兵上策

切

取直卽買讓徙民當衝之法

水能歸壑是奇功宗英心事今誰繼方畧

編摩夜燭紅

謂家天一先生

渡河而北行有日矣張芥航潘芸閣兩河帥畱佐宣

房移居澹園節署賦呈

對開幕府共登壇借箸頻勞詠伐檀虛有浮名動人海
無上策佐安瀾名醫治病籌方苦國手圍棋落子難我爲
常何作箋奏書成還復翦燈看

澹園林木深蔚月夜宿鳥驚噪竟夕

明月園中樹棲鳥夜夜啼羈懷生客館遠道警中間珠斗
行將直明河轉漸低十年湖海夢惆悵汝南雞

烏夜啼

烏生八九子一子頗出羣朝出暮來歸哺之尤恩勤無端
大鳥來啣入青雲端烏入青雲端忽變爲鳳鸞老鳥不見
子哀鳴繞林間一旦雛飛歸文彩矜羽翰審視還却顧老
鳥心悲酸羣鳥繞其後一鳥啼其前雛止還復飛文彩矜
羽翰還起啄老鳥衆鳥驚且喧鳳鸞變鷗臯以報養育恩
草木必有根江河必有源烏雛無有根鳥雛無有源老鳥
夜夜啼啼聲煩且寃珍木何鬱鬱芳林何桓桓兄者慘顏

色聞者摧心肝

澹園三鶴詩

澹園三鶴矯矯奇姿閬苑集樹湍瀨啣芝受命鳳皇爲世
羽儀一鶴高唳響厲雲達一鶴俯啄口畫地維此思南翔
彼懷西飛昔爲儔侶今何睽離一鶴獨立中心徘徊仰視
閬闔浮雲束來鳳皇於飛和鳴鏘鏘夕鳴賀世旦鳴歸昌
歸昌旣鳴奇律斯應鈞天載賡吹萬咸慶白日杲杲麗於
中央照見三鶴以翔以翔鶴舞嬋娟鶴飛縹緲三鶴依然
集於蓬島雲鶴矯翼雪鴻留爪宦海蒼茫有海鷗鳥

題張芥航河帥願遊名山圖十首之二

一白橫春海微茫翠不分軒皇鍊丹處三十六峯雲有客

攜琴去松濤靜夜聞仙人多舊識鸞鶴自爲羣

黃山雲海

生平未入天台境夢裏依稀見石扉幽壑龍眠古潭水茆
蓬鶴坐定僧衣千尋松樹畱雲宿雙闕桃花帶濕飛煨芋
老僧鋤藥叟紅藤遠寄待君歸

天台雲瀑

送馬元伯歸桐城

萬里崑崙水東南此尾閭所宜籌蓄洩兼以佐儲胥桐葉
初飛雁桃花昨上魚勞君續金鑑方畧定何如

桐柏源方盛洪湖漲不消屢經開蔣壩不異放周橋淮郡
連揚郡江潮又海潮西風愁覆轍極目首頻搔

封疆倚老成籌國在持平聞道三台座方爲兩議行宵衣
勞

磨慮簪筆費廷評願矢和衷義憂危答

聖明

蒼翠青山色君家第幾峯書應著司馬樓合臥元龍水部
詩煩寄山公啓待封苔岑有賢達講席且從容

謂鄧嶠
筠中丞

澹園小池爲積雨所漲月夜眺望成詠

居然烟霧暝芳洲紅藕香銷翠葍浮花外鶴聲涼入夜壁
間琴響靜宜秋星移碧樹連波動風約明河抱檻流惻悵
幾家茆屋破暮雲無際海西頭

高郵道中觀漲舟行甓社湖避閘壩急流之險感賦
舟行甓社湖湖光白無際淮水從西來滔滔日東逝四閘
誰所開七邑承其敝城郭與田廬瀦爲鍾水地側耳奔濤

頤道堂詩選卷二十二

三

聲使我心魂悸其南亦歸江委輸趨海溢漲海夏不消江
流亦阻滯何人續金鑑今昔頗殊異治淮重保障高堰宜
經意前以碎石護後以土戩繼五壩宜更營要在審形勢
長與水面平宜開不宜閉二河宜遠徙二隄宜更置治水
同行軍此卽固營衛要在無事日行之以次第下河亦宜
籌歸海遠難至浚河與築隄無患在有備此事上不謀民
豈自爲計黃河患中滿此病頗難治不能導使通卽宜徙
以避尚書減河策使者改河議其事殊不同其心或無異
積潦苦未消措置均不易琴以和成音羹以和有味煌煌
當宁訓和衷期共濟和衷在虛懷勿任才與智虛懷在平
心勿矜位與勢當世有賢才海內有忠義

九重宵旰勤萬室性命寄毋以蕩蕩輕毋以封菲棄治河
在下游且須計通利我苦方畧疎十未得一二計日漕艘
旋重運更來歲治河兼治漕成見未可泥蓬窓企脚眠細
讀河渠志湖風吹綠楊悠然送輕桡

避雨召伯湖雨後雙虹亘天光彩絢麗洵大觀也喜
而賦之

乘風廣陵驛避雨召伯湖雨止日復出雙虹升天衢其長
各萬丈其光皆五色兩虹相隔處中亦千百尺若霧非霧
烟非烟雄虹雌霓相連蜷魚尾脩脩霞彩動孔翠獵獵雲
葉鮮疑是婦娥雙綬帶隨風飄落青天外不然銀漢橫雙
橋天孫機杼閒層霄我思天地中間皆氣耳日者陽氣雨

陰氣急雨乍收雨氣存目光照之色殊麗湖天曠蕩綠樹
齊雨後拍拍羣鷗飛風恬浪靜鏡奩啓水底雙劄青琉璃
吳門也在雙虹裏登樓應見雙虹起倘教望遠憶征夫征
夫舟在虹邊是隔舫幽蘭靜作香載蘭花一船至浦青天閒玩五
文章匣中紫鳳雙毫在莫吐光芒動紫閭

昭關壩

前日過昭關此壩猶可守所苦材不儲亦患土難取今日
過昭關此壩云已開飛流噴晴雪巨響轟殷雷云昨軍符
來畚鍤隨狂浪浪從隄頂過水向口門漲口門水一尺下
游水一丈七邑百萬家半逐波濤往南河兩水忠厥勢分
上下上游高加堰下游昭關壩前水復後水年年相續流

兩水不並治兩患無時休治堰有十議莫厭煩且瑣治壩
亦三策要在行以果兩患今并集聞者心徬徨處變須鎮
定慮事宜周詳既往幸勿悔未來當善防敬以告當事事
過願勿忘

湖中晚泊

湖天水鏡空萬柳捲長風白雨翻孤蜃青天盡兩虹停橈
秋鷺外欹枕暮蟬中畧慰孤芳意幽蘭香一蓬

澹園夜坐

露氣下庭綠小園如此清檐燈驚鳥夢池月照魚行歸舫
憶琴語遠樓聞笛聲銀河與珠斗相望總分明

袁浦中秋聽雨

茫茫洪澤湖浩浩清江浦不見中秋月但聽中秋雨雨聲
何浪浪打檐激飛弩下游十萬家波濤汨平楚哀鴻四野
飛棲息無處所豈因人事艱遂令天心苦側聞西域西天
山烽燧舉將軍大出師何日復千羽飛鳥捷書稀搔首空
延佇我有秋雪莊蘆花被河渚亦有翠淥園松陰鄰葛鵲
秋月夜夜佳不必在三五聽雨亦不惡小軒面場圃胡爲
久畱滯人已爾無補長歌歸去來烟江下柔艣

謝寄梅自津門歸以選羅浚船說見示云將上之當
事用佐治河時定議開放減壩挑濬河身余重其意
而惜其說之不行也賦此贈之

疏濬無長策選羅有浚船能移河底土遠積岸傍田繫枘

方多阻車輪枉自圓

其法置輪於船心設舂於舵尾以人踏輪以輪起土使土入舂別以船受

舂土置之兩岸寬以歲月河底可深洵爲良法

歸帆吾共爾良法待他年

余將南歸故云

澹園秋曉

澹園秋逾澹破曉更清空
鶴影涼依水蟬聲響帶風
微波蓮葉翠細雨蓼花紅
靜悟盈虛理疎闌倚碧桐

萬廉山司馬百漢碑硯歌

司馬健筆盤秋鷹篆法上追斯與永
漢人隸法自篆出紛紛拓本畱溪藤
蒐羅吉金更貞石突過歐趙凌洪曾收束
精神付雕刻硯背點畫如秋蠅分寸妙得方
丈勢但有盤鬱無飛騰硯材亦非近代物
殘甌遠出何王陵琅邪公子好身手

謂子若

解以書勢追衛恆以刀作筆硯作紙筆筆透

石石起稜如登廟堂觀禮器如登嵩華窺峻嶒商周秦漢
萃一室墨香滃起浮雲凝黃流浩浩清淮澄一官失意如
崔丞如君豈合老宦海硯亦慎勿揮吳綾人物各自計干
古刻成宜付焦山僧

重九同人招登來鶴寺小樓口占以謝

未敢登高望登高望遠愁關山仍北闕烽火正西陲雲急
邊鴻晚霜寒塞馬秋征人三十萬誰解覓封侯
未敢登高望登高近更愁清淮方壁立滄海正橫流雨勢
頻驚夜風聲漸入秋莫持門戶見一爲借前籌

治水一篇夜坐澹園池上作

治水如治病症必探其源治水如治兵局必籌其全慮患

在事後決策在事前扶危與定傾但令平不偏今之治水者所見殊不然不與地理準不與天時權但恃勢與位未許他人賢虛懷與和衷二者無一焉高寶爲欹器滄海鄰桑田洪湖爲漏卮巨浸成滔天見水不見地災民殊可憐居者爲魚鱉那得藝憐虵行者爲鴻雁何異叢驅鷗滅壩雖云開黃河水濺濺禦壩雖繼啓洪湖流涓涓湖水壅不消河身淤益堅古方治今病那得沉痾痊羸師當大敵那得軍威宣豈無和緩學疇能猜疑捐豈無孫吳畧疇能倚任專忮嫉賢智避齷齪僉任歡來年重運糧今年回空船或者有天幸不勞胼與胝得免每忘蹄得魚恆忘筌空談亦何補自悔言譏譏行將學巢父棹入西溪烟老鶴夜聲

頤道堂詩選卷二十二

警雜樹涼陰圓側耳聽西風白髮生華顛

畱別芥航芸閣兩河帥並諸同人

九重天鑒拔孤寒海內人將砥柱看已見寒蕪恬下土更
資轉粟達長安思行上策談何易欲藉羣材事亦難省識
功名在遭際且憑赤手挽狂瀾

清淮北出濁河東草廬空籌夜燭紅從古嘉謨多掣肘恭
聞

聖訓勉和衷事來錯節盤根外心在光風霽月中差幸兩
賢不相阨哀鴻滿地入悁悁

懺除圭角付模稜我已年來學定僧王粲登樓人亦諒馮
驩彈鋏客無能鶴聲池館頻攜酒蟲影簾櫳未翦燈家有

句畱匡廬有書堂任城有酒樓慕君思見君下筆開生面
忠愛楚靈均奇謫漢曼倩少陵君舊友東坡君後身不須
邀明月對影成三人天寶逮元和香山亦英妙倘賡長恨
歌應憶清平調我欲營君祠詩卷兼酒樽錢塘西子湖金
陵謝公墩小樓窺黛痕水榭浮春靄且從公等遊羣仙繼
高會

以小落雁峯石置慕李軒爲太白詩仙清供侑之以
詩

焦山儲寶鼎金山珍玉帶古來烟霞姿每起塵壘外我有
一峯翠亭亭立烟靄昨從廣陵還藉作鬱林載持以供詩
仙雲氣生蠶黈彷彿落雁峯拖映玉女黛呼吸帝座通空

外生天籟天竺香山嗜九華坡老愛少陵不留物玩此亦
心快一日三摩挲秋影轉松檜倘遇米襄陽袍笏定須拜
營吳女勝玉紫玉墓於虎邱後山青黛湖上詩以紀
事

茗華麗質勝明珰莫作尋常尺璧看織室心孤虛駕鵲簫
臺綠淺罷驂鸞蒸魚宛劫魚腸冷舞鶴荒塋鶴市寒一樣
望齊門下淚碧雲無際隱層巒

嬌姿又見姪從姑結氣啣悲弔彼姝瘦骨裹衾憐瘞玉芳
魂解佩託畱珠多情韓重相攜否絕世夷光及見無一角
萼蕪芳草綠黛湖原是女墳湖

更與嬋娟共賦詩宗周畱得兩金枝香泥並築瓊姬冢白

石雙鐫玉女碑春雨棠梨還種樹秋櫺薜荔更營祠紫蘭
徑與紅簫路付與山僧好護持

沈采石爲張雲裳寫鄧尉探梅譜卷

一角還元閣三生芳綠華車停香海樹簾卷石樓花玉
墜吹寒月金徽佇曉霞湘妃蛟背立隱隱見鬢鴉
霽雪影層巒疎林倚檻看貂褕香冉冉翠屣步珊珊侍女
呼輕鳳仙人字采鸞墨痕消未盡記取此闌干

哭女弟子辛瑟婢

回首江關便愴神更裁魚素寫酸辛有懷翠袖評詩地無
復金釵問字人落葉聲悽悽蕙歎飄花命短懣蘭因夢中
仙侶分明在應向匡廬步後塵

芳心雅意肯相師
鎮日凝粧寫我詩
一卷離騷知古怨
百篇長慶識相思
仙家紫鳳胎形管
侍女青鸞集絳帷
最是頻年勞問訊
碧雲日暮恨來遲

強扶小病出花前
臨別猶深一見緣
縞袂乍驚天女相
黃繩待証美人禪
心如苦竹空無倚
體竟芳蘭怯可憐
惆悵楓溪橋畔路
烟波極目送吳船

病中小影繪明璫
身後遺詩付錦囊
殘夢也知悽蛺蝶
貞魂應不化鴛鴦
一坏香土畱孤塚
三尺瑯碑寫斷腸
擬傍吳宮雙玉墓
年年兒女弔紅棠

寒夜寄芹兒漢上

庭梅掩映竹檀欒
疎影虛窓坐夜闌
白燼爐灰閒鑊撥
紅

銷蠟淚膩銅盤黃河舂鋪金隄動青海弓刀玉帳寒憐爾
天涯霜月裹白雲東望擁裘看

潘功甫彭詠莪尤榕疇招集網師園

松外斜陽暈酒水詩壇豪氣各飛騰風廊落葉僅初掃烟
閣空池客自憑黏岸枯萍緣斷纜墮檐殘果動懸簷西溪
空有漁莊在秋雪垂綸悵未能

輓萬廉山司馬

當年束髮遠從征年少終軍志請纓青海名王看草檄玉
關老將聽談兵銘功姓氏山畱迹殺賊弓刀夜有聲太息
折腰還作吏半生飄泊誤躬耕

卽論作吏亦循良休暇還登翰墨場金石文章歐永叔烟

霞圖繪郭河陽客來問字詩盈壁衙退求書更滿堂紅徧
棠陰春似水綠眉小史靜焚香

年來羈宦滯河壩三策羣推賈讓賢經濟久爲當世重聲
名曾作古人傳醫心慮在疏方後奕理籌爭落子先申鄭
雖王成底事當門容易誤芳荃

恩牛怨李問如何磨蝎身宮似老坡虛說驗壇歸月旦儘
教宦海慙風波放懷白水盟鷗鷺入夢青山誓薜蘿吳苑
卜居空有約石湖烟雨冷漁蓑

開元寺重修落成功甫招同禮佛觀日本國僧百城
寄方丈詩作

偶向青鷺溯赤烏

寺爲赤烏中燕國夫人陳氏建夫人爲
吳大帝乳母燕國之封當在張弼許安

使遼東口也簡文碑石在精廬寺中石佛二背有維衛迦葉字

浮石像記石像衣製殊地原燕國夫人宅壁有曇陽仙子

書殿後壁上有曇陽子十雙樹因緣觀自在寺為積善菴

所九蓮經卷問何如寺有藏經輒開為明萬歷年造所藏

卷多中渭所長崎遠寄僧伽筆應護天龍辟海魚

書日本國僧百城寄開元寺方丈詩後

道光丙戌吳郡修復開元寺適海舶持歸日本長

崎島大德寺沙門百城詩一卷後題云奉寄蘇州

開元寺老大和尚並海衆高和其詩云空寂清虛

妙法身一阿本性息風輪花明無著無心色眞卽

歷然不變春其二云光照廣空吞大空慈悲隨物

孕西東安禪寥郭眞如殿理智非他我覺中其三
云聞道開元清淨寺從古 皇恩布金田應眞五
百樓禪處空海湛然教外傳其四云開出三千世
界花本來佛法動恆沙識空妙照禪心月放外浮
雲一大家詩有意致語見禪宗按日本僧宗天台
智者教宗派自唐時開元寺出積善庵僧修寺落
成此詩適至似亦彼法中海外因緣也

西方有佛南無佛白馬馱經開戒律日本國在東海東亦
解拈花叅指月徐福闢地因求仙佛法被自中唐年白龜
調布作贊幣秘書侍子橫經傳國僧派衍天台教大千海
月禪心照吳門古刹舊闕元清淨樓禪識微妙寺中石佛

衣製奇浮海云自西晉時長者布金作功德新詩遠寄來
長崎我聞佛法大海水海外因緣捷如此天龍八部散天
花我佛應知大歡喜又聞彼國山出銅市舶久與中華通
寶書香象善知識三願解慕中華風彼國有三願一願得一
象一願得一高僧汝慕華風知嚮義何不皈依

大皇帝不見天台之教至今傳中吳依舊開元寺

蟬中七佛歌

琴鳴得蟬殼於真州楞伽院中有佛像七墳起殼
中袒腹蓮趺妙相完好洵異觀也爲賦此詩

潛園示我蟬中七佛之圖說屬我作爲蟬中七佛之詩篇
是相非相非非相一旦幻出清冷淵或是釋迦以前之七

佛偶然示現跌青蓮東坡居士寫經處夢中忽見光明拳
君於佛海頗深入波羅密證大願船昭明銅佛辦香久文
章妙入蕭梁前今年吳郡開元之古寺石佛重證圓光圓
維衛葉迦卽是七佛中間老尊宿况有海外大德遠寄之
長牋君得七佛適此歲穢花忍草皆因緣我聞蟬者蜃屬
本水族孕靈毓秀乃證天龍禪亦如藕絲芥子納世界中
有阿修羅國須彌顛因思瀛洲巨蜃紫雲吐甕湖老蜃珠
光鮮倘舍佛性示佛像丈六定現金身全我作此詩卽是
七佛尙應見散花天女寶花散徧華髮天

小除夕祭詩是日姬人雲妮二十初度詩以紀之

花月緣兼翰墨緣紅顏白髮共流年祭詩賈島先呈佛進

酒麻姑倘是仙
鈿匣香開晨鏡畔
鳥絲寒寫夜燈前
鷗波澹遠停雲麗
好學清吟字字圓